

瑜伽師地論卷第六十九

彌勒菩薩說

唐三藏沙門玄奘奉詔譯

攝決擇分中聲聞地之三

復次應知毗柰耶由五種制立爲最甚深。云何名爲五種制立。一學制立。二犯制立。三出離制立。四止息制立。五羯磨制立。

復次略由五處應知學制立爲最甚深。一自在故。二不自在故。三顯現尸羅壞過失故。四顯現喜樂鄙業過失故。五彼二過失行不行故。言自在者。若時所化

不隨煩惱勢力而行非諸煩惱令不自在爾時卽依如是所化不自在學行隨意自在不自在者若時所化隨諸煩惱自在而行由諸煩惱令不自在爾時卽依如是所化不自在學行制立不自在學處顯現尸羅壞過失者觀諸性罪定不應行制立隨護尸羅學處顯現喜樂鄙業過失者謂觀能障勤修善品是故制立遮罪學處彼二過失行不行者謂佛觀彼自在所化過失不行故無制立觀不自在過失現行制立學處

復次略由五處應知犯制立爲最甚深云何爲犯謂

能障礙所有善法令不得生當知此障略有五種一慢緩障二有罪障三輕慢障四惡作障五所知障慢緩障者謂懈怠故於諸善法不勤方便有罪障者謂如有一或由貪纏或由瞋纏或由癡纏或由所餘隨一心法諸隨煩惱之所染汙彼旣生起如是煩惱隨煩惱纏堅著不捨輕慢障者謂如有一不尊所學於諸學中不甚恭敬於其所犯不見怖畏而有所犯犯已不能速疾發露於大師所及諸學中性不尊敬惡作障者謂如有一相續染汙惡作所觸於此惡作不能善巧究竟除遣有悵有快有諸惡作所知障者謂

如有一心懷變悔依因淨戒不生歡喜不歡喜故不生適悅。如是乃至心不得定心不定故無如實知無如實觀。由此因緣名所知障。由慢緩障之所觸故於諸煩惱及隨煩惱爲性執著性執著故復爲有罪障之所觸爲有罪障之所觸故於諸學中不深恭敬喜樂所犯喜樂犯故便爲輕慢障之所觸爲輕慢障之所觸故生染汙悔不能除遣所生悔故便爲惡作障之所觸爲惡作障之所觸故變悔轉增由此因緣廣說乃至心不得定心不定故便爲所知障之所觸。如是名爲障生次第與此相違當知卽是五種無障謂

無慢緩障無有罪障無輕慢障無惡作障無所知障復次意樂毀壞者於其所犯尙不能出況能無犯云何名爲意樂毀壞謂略有五種一於精進無發起欲二於煩惱有染著欲三於所犯有起犯欲四於惡作無除遣欲五於等持無引發欲復次意樂具足者尙無有犯況出所犯云何名爲意樂具足當知此亦略有五種一於精進有發起欲二於煩惱無染著欲三於所犯起無犯欲四於惡作有除遣欲五於等持有引發欲如世尊言於所犯罪由意樂故我說能出非治罰故復次應由十處思求所犯謂由別解脫法故。

由廣分別毗柰耶故五犯聚中由犯自相故。由六種差別成重相故。謂制立差別事差別煩惱差別穿穴差別補特伽羅差別時差別。由無羞恥者除波羅闍已迦所餘有殘相故。由初業者非初業者現所行故。由逼惱出離故。由障難出離故。由有犯者時諸苾芻白大師故。由彼白已大師爲欲止當所犯集僧眾故。由僧眾集已制立所犯故。制立所犯已復於後時隨事開聽令得究竟無惱害故。

復次略由五處應知出離制立爲最甚深。謂無染出離故逼惱出離故。障難出離故。無計出離故。說悔出

離故無染出離者。謂如有一於小隨小所犯法中隨有所行若善法增不善法減。由此因緣便不染汙。由此無染卽是出離。是故說爲無染出離。逼惱出離者。謂若有遭困苦重病之所逼切除其性罪於餘犯法隨有所行。由此逼惱卽是出離。是故說爲逼惱出離。障難出離者。謂若見有命難現前或梵行難於小隨小所犯法中隨有所行。由此障難卽是出離。是故說爲障難出離。無計出離者。謂若有一遊於異方經行曠野匱乏之處。隨有一種障難之法而現在前。隨其所有應受用事求受用法而不能得。遂生敬畏受用

此事於小隨小所犯法中隨有所犯。由此無計卽是出離是故說爲無計出離。說悔出離者。謂如有一於五犯聚有餘犯中隨有所犯。遂於有智同梵行所以毗奈耶祕密之法發露陳說。如法悔除。言小隨小所犯法者。謂除性罪。

復次略由五處應知止息制立爲最甚深。一清淨故。二防破壞故。三爲引接廣大義利補特伽羅令人法故。四爲令聖教轉增盛故。五爲遮防難存活故。清淨故者。謂有清淨所作已辦諸阿羅漢。由彼已得極清淨故。僧便於彼小及隨小所有學處皆爲止息。防破

壞故者。謂於僧中一分苾芻於有犯中生無犯想。於無犯中生有犯想。一分苾芻於有犯中生有犯想。於無犯中生無犯想。由此因緣發起種種鬭訟違諍。由此令僧不得安樂。爲欲靜息此諍事故。僧眾和合。白四羯磨於小隨小所有學處。皆共止息。爲欲引接廣大義利補特伽羅令人法者。謂如有一族姓高貴補特伽羅於聖教中多有所作。僧遇彼人無別方便可令人法。爲欲引接令得入故。僧眾和合。白四羯磨於小隨小所有學處。皆爲止息。爲令聖教轉增盛者。謂於未劫諍劫穢劫正現前時。無量有情於小隨小眾。

多學處不樂修學未入法者不欲趣入已入法者復欲離散由此聖教漸漸衰退不得增盛由此因緣僧眾和合爲令聖教得增盛故白四羯磨於小隨小所有學處皆悉止息爲欲遮防難存活者謂於未劫諍劫穢劫現在前時由小隨小諸學處故令諸苾芻難可存活爲欲息此難存活事僧眾和合白四羯磨止息學處。

復次略由五種補特伽羅於十羯磨應知羯磨制立爲最甚深何等名爲十種羯磨一受具羯磨二結界羯磨三長養羯磨四同意羯磨五趣向羯磨六恣舉

羯磨七治罰羯磨八攝受羯磨九白二羯磨十白四羯磨云何五種補特伽羅一良慧喻補特伽羅二鸚鵡喻補特伽羅三炬燭喻補特伽羅四電光喻補特伽羅五書畫喻補特伽羅云何良慧喻補特伽羅謂如有一於上所說十羯磨中唯依於義不依於文唯隨義轉不隨音聲雖於此中未作如是羯磨言詞然能依義發起語言行於此義云何鸚鵡喻補特伽羅謂如有一唯依於文不依於義唯隨文轉不隨於義不能依義發異言詞云何炬燭喻補特伽羅謂如有依少羯磨便多增益現行種種隨意言詞譬如炬

燭。云何電光喻補特伽羅。謂如有一。或一時間於諸
羯磨及諸學中現可得見。於一時間都不現見。譬如
電光云何書畫喻補特伽羅。謂如有一。如其所制羯
磨言詞。卽如是轉不增不減如書畫者。

復有五種僞毗奈耶。一僞制立學處。二僞制立所犯。
三僞制立出離。四僞制立止息。五僞制立羯磨。云何
僞制立學處。謂如有一制立學處。不入契經。不現於
律。違背法性。違背法性者。謂能增長諸不善法。及能
損減所有善法。云何僞制立所犯。謂如有一。於有犯
中立爲無犯。於無犯中立爲有犯。云何僞制立出離。

謂如有一。於不出離。立爲出離。於出離中。立不出離。
云何僞制立止息。謂如有一。於不應止息。制立止息。
應止息中。立不止息。云何僞制立羯磨。謂如有一。於
非法羯磨立法。羯磨法羯磨中立非法羯磨。

復次除十種事。若有苾芻於異人前宣說顯示諸餘
苾芻壞戒壞見壞諸軌則及壞正命。當知此言非清
淨說。云何十事。一於佛寶欲爲損害。或欲劫奪。如於
佛寶。二於法寶。三於僧寶。當知亦爾。四見由彼故壞
戒壞見若壞軌則若壞正命。品類漸漸增長廣大。或
聞或疑。五見彼顯示壞戒壞見壞軌壞命等不正法。

或聞或疑。六欲令彼出壞戒壞見壞軌壞命不善法處。及欲安置諸善法處。七爲護他心。勿使他人作如是解。是諸苾芻皆悉壞戒壞見壞軌壞命。然相覆藏。八或有施主或鄖波索迦或造寺主啟白僧眾作如是言。我不忍許諸有壞戒乃至壞命在此中住。諸苾芻輩若見壞戒乃至壞命者當告我知。若諸僧眾同聞此言。九若有見他由此因緣內懷嫌恨欲起無義。或聞或疑。十僧眾於此壞戒壞見壞軌壞命汙染他家行惡法者無有力能治罰驅擯。唯有一因唯有一緣所謂向他說彼不清淨事。若因嫉妒或因憎恚或

因財利欲毀欲惱欲令損害。由此緣故向他說者當知是名不清淨說。

復次毗柰耶中略有五種能顯法義諸譬喻事。一本生事。二本事事。三影像事。四假合事。五譬喻事。本事者。謂說前生菩薩行事。本事者。謂說前世諸相應事。影像事者。謂說乳酪生酥熟酥醍醐等喻。影顯最勝補特伽羅。又以世間七種河中補特伽羅喻。影顯正法中七種補特伽羅。如是所餘影像種類皆應了知。假合事者。謂大王喻。或良醫喻。如是等類。餘無量喻隨順染汙及清淨品。復有現見世間譬喻。或依

雜染品。或依清淨品。由彼少分共相應故假合而說。譬喻事者。謂說廣長眾多譬喻。如長譬喻及餘無量如是等類。

復次由五種相建立所知諸法差別。何等爲五。一由事故。二由品業差別故。三由智依處差別故。四由智差別故。五由攝餘智差別故。云何由事故。謂略說一切有爲無爲名所知事。云何由品業差別故。謂即此事復有五品所知差別。及此五品所知作業。何等爲五。謂此所知。或有假立故名所知。或有勝義故名所知。或有所作究竟故名所知。或有他心淨不淨行故。

名所知。或有一切種別故名所知。若世俗智能知假立所知。知假立故。如實了知世俗道理。善不善法。有罪無罪。廣說乃至緣生法等。一分應遠離。一分應修習。又能了知世俗言說遊行。世間隨因隨緣而起。眾行法智類智。苦智集智。滅智道智能知。勝義所知。知勝義故能證見修所斷法。斷盡智無生智能知。所作究竟所知。知所作究竟故心得決定無有疑惑。於自斷中離增上慢。他心智能知。他心淨不淨行所知。由此知此。故如實知他所有意樂界及隨眠。十力智能知一切種別所知。由知此故能正於他起一切種教識。

教授能斷一切有情疑惑。能善安置一切有情於善趣果及解脫中有大勢力。能作一切有情利益及安樂事。如是名爲五品所知及五種業。云何由智依處差別故。謂有二種。一、自利行。二、利他行。若隨順斷世俗智。若正能斷勝義智。若於斷所作究竟智。如是諸智應知依自利行依處。若於他意樂界及隨眠所有他心智。若於一切種別所知中所有十力智。如是二智應知依利他行依處。如是名爲智依處差別。云何由智差別故。謂世俗智或善或不善或無記或有漏或無漏。唯是世間無漏者。謂於已斷一切無學身中。

可得此及所餘總名俗智亦唯世間當知所餘法類智等是出世間亦唯無漏盡無生智當知唯於漏盡中生。若不分別盡及無生謂我已得諸漏永盡我未來苦不復當生者。唯是無漏唯出世間若作如是分別者。唯是無漏世出世間世俗智攝是未曾得是阿羅漢相續中生。他心智唯是世間若在異生及有學相續中者是有漏若無學相續中者是無漏。問何因緣故清淨身中諸世俗智說名無漏答由彼身中諸漏隨眠已永斷故。又此諸智是他心智現所行境。此他心智非染汙性非餘染汙現所行境。又彼自性不

與一切煩惱相應是故此智由隨眠故由所緣故由相應故皆成無漏。十力智在如來相續中是未曾得唯是無漏世間智攝何以故由此一切種智皆帶戲論而現行故云何由攝餘智差別故謂神通智解脫門智無礙解智無諍智願智力無畏念住一切種不共佛法等智隨其所應當知皆爲如前所說諸智所攝謂五神通皆世俗智攝若諸異生及諸有學相續中者皆是有漏若在無學相續中者皆是無漏第六神通盡及無生二智所攝盡無生智如前應知空解脫門智八智所攝謂法智類智苦智集智滅智道智

及出世間盡無生智無願解脫門智六智所攝謂法智類智苦智集智盡智無生智無相解脫門智五智所攝謂法智類智滅智盡智無生智無礙解智無諍智願智十力等一切不共佛法智皆世俗智攝皆是無漏在阿羅漢及如來相續中如其所應盡當知諸解脫門建立相如本地分已說不共佛法及無礙解等如菩薩地已說。

復次云何神境云何神境智云何神境智作證謂從一種變作多種如是廣說乃至梵世身自在轉是名神境由神境智於此神境領受示現是故說此名爲

神境。若智具大威德修所成是修果。名神境智。由此智於彼境能領受能示現是故說此名神境智。卽此智種子由生緣所攝受故勢力增長相續隨轉名神境智作證。如是一切總攝爲一。名神境智作證通云何天耳云何天耳智。云何天耳智作證。謂若修果耳所攝清淨色是名天耳與依耳識相應智。名天耳智此智作證。如前應知。如是一切總攝爲一。等如前說復次由此道理餘一切通所作問詞。如前應知。所有釋詞隨其所應我今當說。謂諸他心由有貪等差別而轉名心差別。若具大威德修所成是修果緣彼爲

境智。名心差別智。此智作證。如前應知。如是一切總攝爲一。等如前說。若於過去生自體差別明了記憶名宿住隨念。若智具大威德修所成是修果依止於念與念相應。此方得轉。是故說名宿住隨念智。餘如前說。若諸有情好惡色等種種差別。從彼別別有情眾沒於此別別有情眾生。說名死生。若修果眼所攝清淨色以爲依止緣死生境識相應智。名死生智。餘如前說。若一切結無餘永斷。名爲漏盡。卽於此中世間盡智及無生智。名漏盡智。所餘一切。如前應知。復次諸具神通修觀行者。若遇其時便能示現。或復安

住或行他利或於是中能善問記是故名爲具神通者復次前三通是通非明後三通亦通亦明以能對治三世愚故又初神通能迴異類令他於已發生尊敬第二神通知他所行染淨語業能善詞責令其歡喜第三神通善能知他若淨不淨心行差別能正教授及與教誡後三神通能令遠離常邊斷邊能無顛倒離增上慢依於漏盡宣說中道卽於此中能善教授。

復次觀察三種義勢力故俱分解脫利根阿羅漢苾芻住無諍定謂或有一昔曾於彼無諍等持聞有無

量差別勝利心生喜樂發起勝願由此因緣緣彼爲境猛利意樂數數熏修彼旣證得阿羅漢已由彼爲因由彼爲緣卽於是中心樂趣入是故今者住無諍定又復有一昔異生時令諸有情起無量諍於彼發起種種惱害瞋恨等事今旣證得阿羅漢果於昔所行愚夫之行生大悔愧是故今者住無諍定又復有一自旣證得阿羅漢果欲令無量眾生造作順現法受可愛果業又欲令彼於現法中受可愛果是故方便住無諍定由此因緣熏修邊際第四靜慮以爲依止發生無諍想三摩地防護他心於自所起一切威

儀終不令他起煩惱諍。是故說此名爲無諍。如是爲欲護他心故。隨所依止村邑聚落所住之處周徧於此村邑聚落諸眾生心次第觀察。如是觀已。彼若了知如是村邑。如是聚落。如是衢路。如是家屬。如是眾生。當於我所暫得見時。必定生起諸煩惱諍。卽便隱避。令彼眾生皆不得見。彼若了知不由見故。由不見故。生煩惱諍。則作方便令彼得見。彼若了知由隨順故。令不起諍。卽便觀察所隨順事爲淨不淨。若清淨者。卽與相見隨順彼事。若不清淨。或復觀彼所隨順

事。令他相續起煩惱諍。旣觀察已。不與相見。又審觀察。若因如是語言。如是威儀。如是攝受。如是受用衣服等物。如是說法。如是勸導。令他相續起煩惱諍。卽便遠離。如是語言廣說乃至。如是勸導。彼由多分住。如是住行。如是行。是故說名住無諍者。

云何願智。謂俱分解脫利根阿羅漢苾芻。熏修邊際第四靜慮爲依止。故若聲聞乘隨聲聞智所行境界。若獨覺乘隨獨覺智所行境界。起如是願願我當知。如是如是所知境界。從此趣入熏修邊際第四靜慮。旣入定已。隨先所願一切了知。若諸如來徧於一切

所知境界智無障礙。復次諸佛如來於無靜定而
數人所以者何。有諸眾生勝利益事由起煩惱俱時
成辦。如來於此勝利益事不能棄捨。

復次如熏修邊際第四靜慮以爲依止引發無靜及
與願智當知如來所有一切不共佛法妙智亦爾。餘
神通等。一切靜慮以爲依止皆能引發。

復次唯依諸靜慮及初靜慮近分未至定能入聖諦
現觀非無色定所以者何。無色定中奢摩他道勝毗
鉢舍那道劣。非毗鉢舍那劣道能入聖諦現觀。非生
上地或色界或無色界能初入聖諦現觀。何以故。彼

處難生厭故。若厭少者尚不能入聖諦現觀。況於彼
處一切厭心少分亦無。

復次當說世俗智及出世無漏智初中後際生起差
別。謂世俗智初異生位起。如先說五染汙見及與貪
等相應邪智。是染汙等諸世俗智應斷應知。爲欲生
起彼對治故。復起世間信所攝受無顛倒見。是善有
漏世俗智攝。以此正見爲依止故。次起聞思所成妙
慧於諸念住勤修觀行。亦善有漏世俗智攝。以此爲
勤修觀行。亦善有漏世俗智攝。以此爲依次起見道

方便順決擇分俱行修所成慧於諸念住勤修觀行亦善有漏世俗智攝以此爲依次起世第一法見道無閒道所攝正見亦善有漏世俗智攝如是名爲初異生地諸世俗智生起次第又卽以彼世第一法所攝俗智爲依止故能入見道鼻見道時卽先所修善世俗智所有種子由彼熏修皆得清淨亦名爲修此則名爲諦現觀邊諸世俗智出見道已生起此智證見所斷諸法解脫昔來於彼曾未解脫由此生故是諸聖者於見所斷煩惱斷中能正分別謂那落迦我已永盡乃至不復墮諸惡趣又能了知我今已證得

預流果又能了知我今已斷如是如是所有煩惱又隨所欲應可爲他所記別者當爲建立又審觀察而記別之又能於諸聖諦現觀以無倒慧而正建立復於此上隨其所應未離欲處以世閒道漸次修習能離彼欲乃至能於無所有處離欲作證此諸聖者以出世閒智後所得諸世俗智離諸欲時當知同彼非聖道者所作離欲但能損伏煩惱種子非謂永斷此世俗智是出世閒智後所得應言此智亦是世閒亦出世閒不應一向名爲世閒又修此智略有四道一方便道二無閒道三解脫道四勝進道於一切地修

道所斷。輒中上等九品煩惱。隨其品數。各各差別能隨順斷。是名初道。能無間斷。是第二道。無間斷已。是第三道。次後於斷。是第四道。此勝進道復有二種。或有無間爲斷。餘品修方便道。此於前品名勝進道。於後所斷名方便道。或有無間不修方便。但於前品生知足想。不求勝進。或住放逸。或於已斷以觀察智而更觀察。或有但以伺察作意。而伺察之。當知此道唯名勝進。除未至定所餘。一切近分地中。唯有俗智無出世智。何以故。由未至地是初定心。初靜慮。上所有定心。皆先有定故。聖弟子從此以上。但依根本修出

世智。不依近分。第一有中。所有諸智。皆俗智攝。何以故。彼處作意與出世閒聖智作意不同分故。但作非想。非非想行。出世作意。有想諸定所攝受故。始從學地。乃至於此諸世俗智。當知皆名中際俗智。於阿羅漢身中。所有一切清淨無漏解脫。一切結縛煩惱盡智無生智。及餘一切神通等功德所攝諸世俗智。皆是後際世俗智攝。復次諸菩薩初中後際世俗智者。謂從勝解行地。乃至到究竟地。所有一切世俗智。初際者。謂勝解行地。中際者。謂從增上意樂清淨地。乃至決定行地。後際者。謂到究竟地。又諸菩薩於諸地

中起二種行。謂有戲論想差別行及離戲論想現行。行似出世間善修此故得後所得世俗智攝無障礙智。又諸菩薩有與如來願智相似諸世俗智勝諸聲聞獨覺所得一切願智諸神通等及空智等應知亦爾。由諸菩薩所有功德皆依十力種姓而轉聲聞獨覺則不如是。復次如是已說初中後際諸世俗智。初中後際諸出世智次我當說。謂見道修道無學道。若法智品見道對治欲界見所斷惑。若類智品見道對治色無色界見所斷惑。問。一切類智現在前時皆能了別色界無色界耶。答。若有曾於色無色界所有諸

法善聞善思善取相者卽能了別。若不爾者不能了別。所餘諸智或在毗鉢舍那品或在奢摩他品法智類智二品所攝。又於見道初智生時諸餘智因由能生緣所攝受故皆得增長一切見道。卽此刹那皆名爲得。於此得已後時漸漸次第現前當知見道是勝進道。於修道中若有修習出世間道而離欲者應知如前方便道等皆是出世。若於苦等諸聖諦中有戲論想而現行者是世俗智離戲論想而現行者是出世智。爲於諸諦以有相想善取相故爲如先時所見所知修習種種微妙智故爲以世間諸善厭行令心

厭故爲受種種妙法樂故是諸聖者亦修世間離欲之道而離諸欲無學地中卽如所說出世閒智解脫修道所斷惑故極善清淨又出世智能爲一切世間功德所依持處能令一切上地下地所有功德皆自在轉如是名爲初中後際出世閒智次第生起

復次諸神境智或加行得或生得加行得者如生此間異生有學及與無學諸菩薩等所有修果生得者謂生色界由先修習爲因緣故後於此中生便卽得又有欲界諸天及人一分福果所致如曼駛多王等又傍生趣如飛禽等攝受如是眾同分故如得神通

鬼趣一分亦復如是又有呪術藥草威德亦如神通如作幻惑厭禱起屍半起屍等卽由如是差別道理餘四神通所有差別隨其所應當知亦爾

復次云何所識法謂一切法皆是所識諸識能識由五種相諸識差別如其所應建立所識何等爲五一依緣差別故二欣懺差別故三勝劣差別故四心所差別故五障治生差別故云何依緣差別謂由所依所緣差別建立眼等六識差別眼識了別諸色境界餘識各各了自境界意識了別一切眼色乃至意法以爲境界云何欣懺差別謂苦受相應識名憾此能

了別隨順憂苦不可意法。樂受相應識名欣。此能了別隨順喜樂可意諸法。不苦不樂受相應識名非欣非憾。此能了別隨順捨受非二諸法。云何勝劣差別。謂不善法及有覆無記法相應識名劣。此能了別諸染汙識所行諸法。善法相應識名勝。此能了別一切善識所行諸法。無記法相應識名非勝非劣。此能了別自所行法。云何心所差別。謂有心所偏諸心起。復有心所偏善心起。所餘心所應知如前。有漏法中已說其相。偏諸心起復有五種。謂作意觸受想思。如前意地已說其相。偏善心起復有十種。謂慚愧無貪無

瞋無癡信精進不放逸不害捨。如是十法若定地。若不定地。善心皆有。定地心中更增輕安。不放逸等。唯是假法。此相應識皆能了知一切境法。云何障治生差別。謂所治障有十五心。何等十五。謂欲界繫總有五心。見苦見集見滅見道及修所斷。如欲界繫總有五心。色無色界當知亦爾。能對治心是第十六。謂諸無漏學無學心。如是所治及能治識。隨其所應各能了別自所行法。復次生差別者。略有五種。一欲界生行。二色界生行。三無色界生行。四往上地生。五還下地生。欲界生行者。從欲界繫。若善若染汙。若無覆無

記心無閒徧欲界繫一切心生是名欲界識生差別。如欲界繫如是色無色界繫自地三心無閒皆生自地三心。若先未起靜慮無色初欲生時要從欲界善心無閒初靜慮地善心得生。初靜慮地善心無閒第二靜慮善心得生如是乃至無所有處善心無閒第一有地善心得生必從色界善心無閒初學心生。學心無閒無學心生若先已起靜慮無色卽於彼地不退失者彼從欲界善心無閒隨其所樂上地諸心及學無學心欲起現前先已善取彼行相故於彼諸心如意能起。如是所餘上地諸心無閒所起如其所應。

當知亦爾。又從欲界無記心無閒色界善心生。如色界果欲界變化心卽從色界善心無閒此欲界無記心生。又說此心爲欲界者當知是彼影像類故非自性故。又欲界沒生上地時欲界善心無記心無閒上地染汙心生謂生初靜慮乃至有頂以一切處結生相續皆染汙心方得成故。如是應知往上地生諸識決定於自所行生起差別又諸異生退先所得世閒靜慮無色定時由染汙心現前故退此下地染汙心從上地善心染汙心無閒生又從上地沒生下地時從一切上地善心染汙心無記心無閒唯有下地染

汙心生。如是應知還下地生諸識決定於自所行生起差別。如是障治生差別故諸識決定於自所行了別所識諸法差別。

瑜伽師地論卷第六十九